


Bampeve Ya Yimbi

Na Kati Ya Nzutu

 Ntangu yayi mu...?...[Kisika ya mpamba na bande—Mu.] Yayi kele mbala ya ntete mu sala yawu na mosi ya balukutakanu ya munu kubanda yina mu ke kwendaka na kumwangisa nsangu. Yayi kele ntangu ya malu-malu. Mpangi Baxter me kwenda; mpe—mpe Mpangi Bosworth kele na Inde, to, na Afrique; mpe Mpangi Baxter, mu zaba ve kisika yandi kele. Yandi me kwenda kisika mosi, mpe ndambu ya bawu me basika mpe me kwenda. Mpe Billy na munu kele awa beto mosi, na yawu beto ke na kuzwa kaka ntangu mosi ya nene: ke telama kaka, ke seka mpe ke kudya. Na yawu, beto—beto ke tala mutindu ti mu banza beto lenda, na lusalusu ya Mfumu, beto lenda twadisa lukutakanu nzila nyonso, beto mosi. Ya kele samu na yina mu kele na kyese na kumona yawu kulandila mwa fyoti, samu na kikuma kaka mosi yina. Mu ke kwikila ti Mfumu ke sadisa beto na kusala yawu. [Dibuundu me tuba, “Amen.”—Mu.] Ntangu yayi, beno zaba ya kele. . .

Mu zola ba-organisateur ya munu. Mu ke na bampangi mosi ya luzolo, Bosworth, Baxter, Lindsay, Moore, bawu nyonso, mu ke na bawu tanu, Baron von Blomberg. Ba kele kaka bantu mosi ya mbote mingi. Kasi ya kele na dyambu mosi na yawu, ntangu beno ke baka nkonga ya bantu kintwadi, mosi kele na kima mosi, mosi kele na kima yankaka. Ntangu yankaka ya kele ya kuswaswana na yina mu ke banza munu mosi. Na yawu mu—mu—mu ke tala mutindu mu kele kaka na kimpwanza ntangu yayi. Beto lenda kaka kuzwa ntangu mosi ya nene, kaka kuyidika maboko ya beto ya basimisi, mpe kukota kaka mpe kudya. Mu ke na kubanza na kuyidika basimisi ya beno mpe kuzwa ntangu mosi ya nene.

Biblia ya munu ya ntete vwandaka yinza. Mu longokaka Nzambi na nzila ya yinza. Mpe mu zola kuloba. Mu zola kuloba mingi! Mpe nge zola kuloba, mwana? Kana nge zola kuloba, mpe zola mama ya nge, nge ke vwanda mwana-bakala ya mbote. Mpe dyaka kubalula ntima ya munu kukatulaka yawu nyonso ve na munu. Na yawu kilumbu mosi mu vwanda na zulu ya myongo, na kati ya kuloba. Ntangu yayi, yayi kele kaka samu na ndandu ya mbote ya mwana yayi ya bakala. Mpe mu vwanda loba na zulu kuna na kati ya myongo. . . Mpe samu na mwa bana yankaka, mpe, bayina kele ya kuvwanda awa. Mu vwanda loba truite. Mpe, oh, ya kele mbote mingi na nsungi ya printemps. Mu vwanda kwenda mutindu yayi, mpe ya vwanda na truite kaka na dibulu yina vwanda landa, beno zaba, mutindu yayi. Mpe mu vwanda

pesa kaka nkembo na Mfumu mpe vwanda kuzwa ntangu mosi ya nene, mu vwandaka boka. Bantangu yankaka, mu vwanda bika na yisi singa ya ndobo. Mu ke kwikilaka na kuboka. Amen. Kieleka mu ke kwikilaka na yawu. Samu, mu zaba ti ya kele na kima ke simbaka munu, mpe ya ke salaka kima mosi na munu.

² Na yawu mu kwendaka na mwa suka na suka yango, mpe ntangu mu vutukaka, kima ya ngitukulu: Ya ke na ba-ulusu mingi na kizunga yango na zulu kuna, na New Hampshire. Mu vwandaka na mwa yinzo na zulu kuna, kisika mu ke lobaka. Mu vwandaka na mwa tenta mosi ya ntama ya kuvwanda kuna, mwa tenta mosi ya ntama ya munu mosi yina mu vwandaka vwanda. Mpe ulusu ya ndombe kele kima ya kulutila yimbi yina kele. Na yawu, mama mosi ya ulusu ya kiboba na bana zole ya ba-ulusu kwizaka kota kuna, mpe ba salaka muvusu ya nene na kati ya tenta ya munu!

³ Ntangu yayi, yinki beno banza ti mu zolaka salaka na ulusu yango, mwa mwana ya kento yina kele na manima kuna na bansuki ya mbwaki, na manima kuna? Kieleka mu zolaka landa yandi, mutindu yina ve?

⁴ Kasi beno tala yina yandi salaka. Yandi kotaka, yandi me pasula tenta ya munu na yisi mpe yandi me mwangisa nyonso na ngaanda, mpe me kudya madya ya munu nyonso yina vwandaka na munu kuna, mpe yandi vwanda kuzwa kilengi mingi kaka. Na yawu ntangu mu kwizaka, yandi me kwenda na malembe. Mpe yandi me boka na ngolo samu na kubokila bana ya yandi ya ba-ulusu, mpe mwa mwana ya ulusu mosi me kwenda na yandi. Mpe yankaka yina zolaka kutina ve; yandi vwandaka kaka kuna. Yandi vwandaka ya kupesa munu mukongo, mutindu yayi, mpe yandi vwandaka sala kima mosi. Mpe mu vwanda na kima ve na diboko ya munu kasi mwa soka ya ntama ya diboko. Mu zengaka mwa ba-sureau pene-pene kuna. Mbote, yandi me kima ntama mingi ve, oh, mu banza tii na poto ya alo-alo yina kele na ngaanda kuna, mpe yandi me vwanda. Yandi me boka samu na kubokila mwa mama ya kiboba ya ulusu yina, mpe yandi kuwaka ve. Yandi landaka na kuvwanda kaka kuna.

⁵ Mu vwanda banza, “Yinki mwa kibulu yango ke na kusalaka?” Mu me belama mwa fyoti. Mu vwanda na boma ya kubelama mingi, mu vwanda na boma ti yandi zolaka sala munu manzaka. Na yawu—na yawu mu—mu vwanda kuka ve kumona yinti, mpe mu zabaka ti yandi lendaka mata mpe. Na yawu, mpe mu vwanda zola ve kubelama mingi na yandi, samu ti mu zaba nkadulu ya ulusu. Na yawu, mu belamaka kaka mwa fyoti. Mpe beno zaba yinki kusalamaka?

⁶ Ntangu yayi, mu ke zolaka ba-crêpe. Beno bana ya babakala ke zolaka ba-crêpe? Oh, mwana! Oh, mu. . . Babakala ya kukula, mpe. Mu me mona bawu kunangula maboko ya bawu. Beto nyonso zola ba-crêpe, mpe mu ke zolaka kaka yawu, mpe mu

ke zolaka kutiamuna bwiki na zulu ya yawu. Na kuvwandaka Baptiste, beno zaba, ya kele yina ke kangaka beto na kuvwanda ya kusungama, beno zaba, ya kele bwiki, beno zaba. Na yawu, mpe beno kuwa, mu ke mwangisaka yawu ve, kieleka mu ke botikaka yawu. Kieleka mu ke tiamunaka yawu na zulu tii ya ke kuma kieleka mbote mpe kilo. Mu ke mwangisaka kaka mwa fyoti awa mpe kuna ve. Kieleka mu ke tiamunaka yawu na zulu ya yawu, mu ke salaka yawu kufuluka yawu nyonso na bwiki.

⁷ Mpe kuna, beno zaba, mu vwandaka na kantini ya bwiki na zulu kuna, kantini mosi ya ba-litre zole ya bwiki. Mpe ba-ulusu ke zolaka mingi bwiki. Na yawu mwa niama yayi kotaka kuna mpe katulaka kifiniku ya kantini ya bwiki yango, mpe yandi vwandaka ya kuvwanda kuna mutindu yayi, na mwa kantini yayi ya bwiki na yisi ya diboko ya yandi, mutindu *yayi*. Yandi kuzwaka . . . Mpe yandi vwanda zaba ve mutindu ya kudya yawu, mutindu beno zolaka sala, beno zaba, na yawu yandi vwanda bula kaka mwa makulu ya yandi na kati mpe vwanda lesa yawu mutindu *yina*, mpe vwanda pela yawu. Mpe yandi balukaka na kutala na kisika ya munu, mpe mwa meso ya yandi vwandaka nyonso ya kuvukana, mwa kivumu ya yandi vwandaka ya mulungu mutindu ya lendaka vwanda, na bwiki. Yandi vwandaka kaka ya kuvwanda kuna, vwanda kotisa diboko ya yandi kuna mpe vwanda lesa bwiki, mutindu *yina*, kaka mutindu ya ngolo yandi lendaka lesa.

⁸ Oh, la la, mu banzaka na lukutakanu ya ntama ya mbote ya Mpeve-Santu, ntangu beto ke bikaka kaka kantini ya kufunguka, beto ke kotisa diboko ya beto na kati ya mbungu mpe kulesa mutindu beto zola. Kaka kulandila, beno zaba, kaka kulesa mutindu beto zola.

⁹ Mpe beno zaba yinki vwandaka dyambu ya kusekisa, na yawu? Na manima ti mwa niama yina kuzwaka mutindu yina yandi vwandaka zola kuzwa, yandi bikaka na yisi kantini mpe yandi kwendaka na kukimaka kuna. Beno zaba yinki kusalamaka? Mama ya ulusu mpe mwa ulusu yankaka yina bandaka na kulesa yandi, samu na kukatula yandi bwiki.

¹⁰ Na yawu, mbote, mu banza ti lukutakanu ya beto ke vwanda kima na mutindu yina, mu banza, samu beto lenda kaka kulandila kuzonza na bampangi, mpe ti nkembo ya Nzambi kubwa na zulu ya beto. Mbote mingi.

¹¹ Mu ke na kyese na kumona beno bana ya fioti awa. Mu zola kozonza dyambu mosi na beno mutindu yina. Mpe mu banza mbasi na manima ya midi, beto ke kuzwa ntangu mingi, mpe—mpe beto lenda kuzonza mwa ntangu mingi. Mpe beto ke zonza na tata mpe mama na ntangu yayi na yina me tala kima mosi.

¹² Beto ke zonzila na *Bampeve Ya Yimbi*. Na Psaumes 103:1 tii 3, beto ke tanga banzila yayi. Balongi mingi mpe ba-membre

mingi ya clergé, to muntu yina ke tangaka Biblia, zaba yawu na ntima.

O moyo ya munu, ke na kusakumuna MFUMU: mpe nyonso yina kele na kati ya munu, ke sakumuna nkumbu ya yandi ya santu.

O moyo ya munu, ke sakumuna MFUMU, mpe ke zimbana ve nyonso ya bandandu ya yandi ya mbote:

Yandi yina ke lemvukilaka disumu ya nge ya nkú; yandi yina ke belusaka nyonso ya bimbevo ya nge;

¹³ Mu zola beno kutala kuna, ya vwandaka “nyonso.” “Yandi yina ke lemvukilaka nyonso ya masumu ya nge ya nku, Yandi yina ke belusaka nyonso ya bimbevo ya nge.” Ntangu yayi beto lenda kulumusa bayintu ya beto kaka samu na ntangu fyoti.

¹⁴ Ntangu yayi, Tata ya Mazulu, beto me tonda Nge na manima ya midi yayi, na yina beto kele awa. Beto me tonda Nge samu na bana ya fyoti yayi yina kele ya kuvwanda awa, ba kele babakala ya mbasi, mpe bakento, kana ya kele na mbasi mosi, kana Yesu vutuka nswalu ve. Mpe ntangu yayi, Tata, beto ke sambila ti—ti Nge kusakumuna beto ntangu yayi na yina beto ke na kuzonzilaka ntangu yayi na Ndinga ya Nge, mpe na yina me tala mbeni ya beto ya nene, Satana. Beto ke sambila, Nzambi, ti Nge kubika beto kutula na ntwala, kima ya nene ya masini awa, ngolo ya Nzambi, yina ke telemina yandi na nkokila yayi na konso kitini ya ntoto ya yandi, Mfumu, mpe kulakisa yandi ti yandi kele na muswa ata fyoti ve, ti Klisto kunungaka yandi samu na beto kuna na Calvaire, ntangu Yandi kufwaka, mpe Yandi katulaka bimumu nyonso mpe katulaka Satana nyonso—nyonso ya ngolo yina vwandaka na yandi. Mpe, Nzambi, me pesa beto ndwenga mpe lubakusu ntangu yayi, samu na kuzaba mpe kubangula na bantu yinki mutindu ti bawu lenda zaba mutindu ya kuvwanda ya kubeluka mpe kununga Satana. Na Nkumbu ya Yesu beto me sambila. Amen.

¹⁵ Ntangu yayi samu na mwa baminuti beto ke zonzila na *Bampeve Ya Yimbi*. Beno ke kuwaka mingi na yina me tala bampeve ya yimbi. Ntangu yayi, mbasi na manima ya midi mu banza ti beto ke sukisa yawu. Mu vwanda zola bilumbu zole ya lumingu yayi, na mutindu nyonso, samu na kulonga na zulu ya yayi, kaka . . . to bilumbu zole ya balukutakanu ya manima ya midi, samu na kuzonzila na yayi.

¹⁶ Ntangu yayi, kima ya ntete, yinki kele mpeve ya yimbi. Beno ke kuwaka bantu mingi kuzonzila na yina me tala mpeve ya yimbi. Mbote, ntangu yayi, “mpeve ya yimbi, dyabulu,” nyonso ke katuka na mpova mosi, mpe na Kingelezi ba ke bokilaka yawu “yina ke pesa mpasi.” Muntu yina ke pesaka mpasi kele dyabulu, mpeve mosi ya yimbi. Yandi ke tuba . . . Ntangu yayi, Biblia bubu yayi kele, samu na mingi, samu na bantu mingi, ya kele buku mosi ya ntangu ya ntama yina nkooko ya bakala mpe nkooko ya

kento vwanda tangaka, to kima mutindu yina. “Ya kele na mingi ve na kati ya yawu, ya kele ya biboba, mpe nyonso yina.” Kasi yina kele luvunu. Ya kele samu na muntu nyonso. Mpe bampeve ya yimbi kele yina ke pesaka beto mpasi.

¹⁷ Ntangu yayi, ya kele na bampeve ya yimbi yina ke kwizaka na kati ya moyo ya muntu, mpe yina kele, landila misiku ya ndinga, ya ke vwanda—ya ke vwanda na kati. . . Kasi, mu ke tuba yayi, mpeve ya yimbi yina ke kotaka na kati ya moyo kele kima yina ke pesaka mpasi na moyo.

¹⁸ Bambala mingi beno lenda mona muntu mu banza ya kulawuka. Ntangu yayi, yandi lendaka vwanda dyaka muntu yina me ndima, ya kufuluka na Mpeve-Santu, mpe dyaka kuvwanda nyonso ya kulawuka. Beno me mona? Ya kele kieleka. Yina kele na kima ve ya kusala na moyo. Ya ke pesaka mpasi, beno me mona, kima yina ke pesaka bawu mpasi.

¹⁹ Ntangu yayi, bimbevo nyonso, beto fwana zaba ntete ti bimbevo nyonso ke katukaka na dyabulu. Nzambi kele ve mfumu ya bimbevo. Ata kimbevo ke katukaka na Nzambi. Nzambi bambala yankaka ke pesaka muswa na Satana na kutula na beto bimbevo, mutindu fimbu samu na kuvutula beto na yinzo ya Nzambi, ntangu beno ke tumamaka ve. Kasi kimbevo, na kubanda ya yawu, katukaka na dyabulu. Beno lenda banza ti muntu lenda kwikila ti Nzambi, Tata ya beto ya Mazulu, lendaka vwanda mfumu ya kima mutindu kimbevo mpe lufwa? Mbote, ve, Yandi kele ve, vwandaka ata fioti ve, ke vwanda ata fioti ve. Nzambi ke pesaka muswa na lufwa samu na kukondwa kutumama. Nzambi ke pesaka muswa na lufwa. Mutindu musoniki mosi kutubaka, “Nyonso yina lufwa lenda sala, Nzambi me kangisa yawu na tomabilu mpe yawu ke na kubenda beto na Ntwala ya Nzambi, mukwikidi.” Kasi mpova *lufwa* zola tuba “kukabuka.”

²⁰ Yesu tubaka, “Yandi yina ke kuwa Bandinga ya Munu mpe ke kwikila na Yandi yina me fidisa Munu, ke kuzwa Luzinga ya kukonda nsuka ve.” Mpe Yandi tubaka, “Mu kele mvumbukulu, Luzingu, yandi yina ke kwikila na Munu, kana yandi vwandaka ya kufwa, yandi ke zinga dyaka, mpe muntu nyonso yina ke zingila mpe ke kwikila na Munu ke kufwa ata mbala mosi ve.” Mpe beto ke nataka banzutu ya mosi na mosi na kisika ya santu ve ya ndyamu ya beto. “Kasi yandi ke kufwa ata mbala mosi ve.”

²¹ Ntangu yayi kana beno tala mbote ntangu Yandi zonzilaka na yina me tala Lazare, Yandi tubaka, “Lazare kele ya kulala.”

²² Bilandi, bantu mutindu beto, bawu tubaka, “Oh, kana yandi kele ya kulala yandi kele mbote.” “Yandi vwanda zola kutuba vwanda pema,” yina bawu vwanda banza.

²³ Kasi Yandi kwizaka mpe zonzaka na bawu na nonzolo ya bawu. Yandi tubaka, “Yandi me kufwa, ya kele yina beno ke kwikilaka. Kasi,” tubaka, “Mu ke kwenda vumbula yandi,

kuvumbula yandi.” Beno me mona? Beno me mona? Ntangu beno ke . . .

²⁴ *Lufwa* zola kutuba “kukabwana.” Ntangu yayi, kana mosi ya beno, mosi ya dikanda ya beno kufwa, to kima, yandi kele, kana yandi ndimaka, ba kele ya kufwa ve. Ba kele ya kufwa landila dibanza ya kimuntu. Kasi ba kele kaka ya kukabuka na beto, kasi ba kele na Ntwala ya Nzambi. Ba kele ya kufwa ve, mpe ba lenda kufwa ve, ya lenda salama ve ti bawu kufwa. Yesu tubaka, “Yandi yina ke kuwa Bandinga ya Munu mpe ke kwikila na Yandi yina fidisaka Munu ke na Luzingu yina ke sukaka ve, mpe ke luta na lufundusu ve, kasi me luta lufwa na Luzingu.” Na yawu, yandi lenda ve kufwa. Nyonso yina lenda kufwa ve, ya Seko, ya lenda kufwa ve. Ya kele Luzingu yina lenda kufwa ve. Yandi kele na Yawu samu ti Nzambi pesaka Yawu na yandi. Mpe ve—ve na mutindu ya kulunga; ya kele na . . . Ya kele kukondwa kima. Nzambi pesaka Yawu na yandi.

²⁵ Nzambi ke bokilaka. Muntu ve lenda kwiza na Nzambi kana ti Nzambi kubokila yandi. Yesu tubaka, “Muntu ve lenda kwiza na Munu kana ti Tata ya Munu kubokila yandi ve, kubenda yandi ve.” Ya kieleka? Na yawu ya kele Nzambi na nyonso. Mu banza ti mbasi na manima ya midi beto ke zonzila mwa fyoti mingi na yawu, samu ti mu zola kunata kima yayi ya *kimbevo*, na beno, samu ti beno kumona yawu.

²⁶ Ya vwandaka na ntangu na yina beto kumaka nkuna na kati ya nkooko ya nkooko ya beto ya bakala. Beno zaba yawu. Dokotolo zaba yawu. Mbote, beno, mpe, beno bayina ke tangaka Biblia. Beno zaba ti nkuna ya luzingu kubandaka na kati ya nkooko ya nkooko ya beno ya bakala, na kukuma nkuna, mpe lutaka na nkooko ya beno ya bakala, na manima na kati ya tata ya beno, na manima na mama ya beno mpe kisika beno kele ntangu yayi. Ya kele kieleka. Masonuku ke longisa yawu mpe. Yawu yayi Masonuku samu na beno kana beno zola. Mu ke kwikila ba tubaka ti Lévi kufutaka kikunku ya kumi ntangu yandi vwandaka na kati ya ba-rein ya Abraham, yina vwandaka nkooko ya nkooko ya yandi ya bakala. Ya kieleka? Na yawu, beno me mona, nkuna bakaka nzutu kuna.

²⁷ Kasi myoyo ya beno kusalamaka ntete mbandukulu ya yinza, ntangu Nzambi vangaka muntu na kifwanisi ya Yandi Mosi; mpeve ya muntu; muntu *mosi* ve na kifwanisi ya Yandi Mosi, kasi *muntu* na kifwanisi ya Yandi Mosi. Beno me mona? Mpe kuna Yandi salaka bawu bakala mpe kento, ntete Yandi kuzwa ntete muntu na fundu-fundu ya ntoto. Mu vwanda zola ti beto kuzwa ntangu mingi na manima ya midi yayi, kuzwa ntangu ya beto mpe kuvutuka na yawu. Kutala kaka mutindu Nzambi. . . Ntangu yayi, ya kele na kati-kati ya nzila, kasi, ntangu beno ke mona, ya ke sungama mbala mosi na nzila. Beno me mona? Wapi mutindu ti Nzambi, ntama na mbandukulu, yina Yandi kusalaka kuna, mpe mutindu Yandi kukulumukaka na ntoto

mpe mutindu ti Yandi salaka muntu na kifwanisi ya Yandi; mpe kuna Nzambi me baluka mpe me kusala na kifwanisi ya muntu, samu na kuvulusa muntu.

²⁸ Ntangu yayi, ntangu Nzambi salaka muntu na kifwanisi ya Yandi, yandi vwandaka muntu kimpeve. Mpe kuna ya vwandaka ve na muntu samu na kugata ntoto. Na yawu Yandi vangaka muntu na fundu-fundu ya ntoto. Ntangu yayi, ba-chronologiste, mpe bayankaka yina, mpe bantu yayi yina ke sosaka mpe ke kuzwaka mikwa ya ntama, mpe nyonso yina, mpe ke kwikilaka na nsobolo . . . Mu ke kwikilaka na nsobolo na mutindu ya mbote. Muntu ke sobaka na yandi mosi, kasi nyonso ve na cellule mosi. Ve, tata, samu ti ndeke kele ndeke katuka ntangu Nzambi salaka yandi ndeke, mpe dikaku kele dikaku, muntu kele muntu. Ya kele kieleka.

²⁹ Ntangu yayi, mu vwanda zonza na dokotolo mosi awa ntama mingi ve, na Louisville. Yandi tubaka, “O, Révérend Branham!” Mu vwanda zonzila na yina me tala mutindu bantu ya kuna na Afrika, mutindu bawu ke kudyaka, ke kwenda kaka na . . . Oh, bima mosi ya kulutila boma yina beno me monaka ntete ve, mutindu ba vwanda kudya! Ba ke baka kaka bima yina me sambukila, na minsyobo na kati ya yawu, ke ningisa kaka yawu, na munsyobo mpe nyonso. Yina ke sala ata luswaswanu samu na yandi. Beno me mona? Ba tubaka . . . Ke kunwa kima nyonso, ke sala ata luswaswanu na yina ya kele. Yandi tubaka, “Kasi, Révérend Branham, bantu yina kele bantu ve.”

Mu tubaka, “Oh, yinga, ba kele bantu. Kieleka ba kele bantu.”

³⁰ Mu tubaka, “Kima yina kele pene-pene mingi na muntu, na mulonga ya bibulu, kele kimpenzi. Mpe beno me meka mafunda yiya ya bamvula na kunyunguta kima mosi na kimpenzi yayi, mpe yandi lenda kusala yawu ve,” Mu tubaka, “samu ti yandi lenda ve kubanza. Yandi kele na kima ve ya kubanzila.” Oh, beno lenda longa yandi mwa bima mutindu na mpunda, hue mpe dia, to kulwata bineti, to kunwa makaya, to kutelama na dikaalu yandi mosi, kunata mpunda, to kima mutindu yina, kasi kaka mutindu “hue” mpe “dia” samu na mpunda, to “wheet” samu na yimbwa, to kima mutindu yina. Mu tubaka, “Yandi kele kibulu.”

³¹ “Kasi beno bika munu kuvutuka na Afrique, na dikanda ya mfinda yina kele na bawu kuna, mpe ya kele mwa dikanda ya ba-bochiman.” Mpe mu tubaka, “Na kutala nkooko ya nkooko ya nkooko ya nkooko ya tata ya yandi kumonaka ata mbala mosi ve mundele to kima ve. Kima kaka yina yandi zaba, yandi zaba ata ve yina kele diboko ya bakala mpe ya kento. Kima kaka yina yandi zaba kele kudya, mpe yandi ke kudya yina yandi lenda kuzwa na diboko ya yandi, kana ya kele nsuni ya muntu, kima nyonso yankaka, ya ke sala ata luswaswanu ve samu na yandi, kaka ti yandi kudya. Kasi beno bika munu kuzwa yandi

na bamvula tanu, mpe na bamvula kumi na tanu yandi ke zonza Kingelesi mbote mpe ke kuzwa ndongosolo ya mbote. Samu na yinki? Yandi kele na moyo. Nzambi salaka yandi muntu, mpe yandi kele mpe na muswa ya kuwa Nsangu ya mbote, ata mbala mosi, mutindu beto ke longaka bisika nyonso awa, bisika nyonso na Amerique, na bantu, bambala na bambala na bambala, mpe kubondila, kulandila kaka mpe nyonso. Beno bika yandi kuwa yawu mbala mosi, mpe beno tala yandi mbote kuboka mpe kukima na autel na nswalu mingi.” Beno me mona? Yinga, tata!

³² Ya kele kisika ntima ya munu kele, mpangi-bakala, bubu yayi, ntangu mu ke banzaka na Afrique, mpe mwa maboko ya bawu ya mawa ya ndombe ya kutelama, ke tuba, “Mpangi Branham, mbala mosi dyaka na yina me tala Yesu!” Oh, kyadi! Ya kele na kima na kati ya munu yina ke timuna mpe ke pela. Kaka na nswalu mu ke kuzwa mbongo ya kulunga, mu ke kwenda kuna, mpe. Ya kele yina mu ke salaka na konso mbongo yina mu ke kuzwaka, nyonso, Nzambi zaba, kukatula kaka yina mu lenda kudya. Mpe bantu mingi ke pesaka munu bilele ya munu. Mpe kaka yina mu lenda kaka kuzingila, munu mosi, mutindu mu lenda, mu ke tula yawu mbala mosi na kati ya mbongo ya kisalu ya mission yina kele kiwisa na luyalu. Mu ke futaka ve mpaku samu na yawu. Samu na kuzwa mafunda tatu to yiya, tanu ya ba-dollars, mpe mu ke sabuka kuna mpe ke longa Nsangu ya mbote na bantu yina mu zaba ti kilumbu mu ke pesa mvutu. Mpe mu ke zaba kupesa mvutu.

³³ Mu vwanda sala, ntangu mu ke kwenda na mbanza mosi, mu ke kuzwa lukutakanu ya nene ntangu ba vwandaka na mbongo mingi, mpe ba vwanda kuzwa ba-campagne ya nene mpe mafunda ya ba-dollars, mu vwanda pesa yawu na Croix-Rouge mpe nyonso. Ntangu yayi, ntangu yayi, ya kele ve samu na kutonga bawu, kasi ke kulumuka na bala-bala na ditoma ya mafunda yiya ya ba-dollars, na buto ya simisi ya diamant, ke na kunwa dikaya, mpe nkama tanu ya ba-dollars na lumingu na mbongo yina bantu ya kube- . . . Ve, tata! Kieleka, ve! Mpe na bayayi, na yina kaka beno ke katuka mbanza, ba ke tuba, “ba-exalté,” mpe nyonso mutindu yina, mpe ke sala liseki, mpe ke zonza yimbi ya nsambulu yina beto ke nwaninaka. Ve, tata!

³⁴ Mu ke bakaka yawu munu mosi, mpe na ntuala ya Nzambi Zuzi ya munu, mu ke tulaka yawu na kati ya kisalu ya Nsangu ya mbote kuna, samu mu zaba ti Kilumbu yango yina mu ke . . . ntangu mu fwana pesa mvutu ya mbongo samu na kisalu ya munu, ya ke vwanda ya kulunga. Ya kele kieleka, samu ti mu me bakula mutindu mu ke tala bantu mu ke tala Nzambi. Kaka mvwandulu ya munu na beno kele mvwandulu ya munu na Klisto. Mpe mvwandulu ya beno na munu kele kima mutindu mosi, ya kele kieleka, na Klisto.

³⁵ Ntangu yayi, na kumona bantu mutindu yina, mpe na kumona mutindu ti muntu, kuna, na moyo yina lenda kufwa

ve ntangu yayi, yina lenda kufwa ve, yina lenda beba ve, lenda kusala kima ve kana kuzwa Luzingu ya seko, ti Nzambi na mutindu ya kulunga, na luzolo ya Yandi Mosi, kupesaka yawu na beno. Mpe ntangu yayi, kuna, ntangu yayi mu . . .

³⁶ Beno bika munu kusungika yayi kaka mwa fyoti, to kutuba kima. Muntu ke kwenda mpe ke tuba, “Mpangi Branham kele Calviniste.” Ve, mu kele yawu ve. Mu kele Calviniste ntangu nyonso yina Bucalviniste kele na kati ya Biblia. Kasi ntangu Bucalviniste ke basika na Biblia, kuna mu kele Arminien, beno me mona. Mu ke kwikilaka na busantu mpe ke kwikilaka na Bucalviniste, mpe. Kasi, bawu zole, mosi me baka kintala mpe me kwenda nzila *yayi*, mpe mosi me baka kintala mpe me kwenda nzila *yina*. Kana ya vwandaka ve Buku ya Éphésiens, samu na kuvutula yawu mpe kutula yawu na kisika ya kulunga kisika Nzambi salaka, beto nyonso zolaka vwanda na kati ya muvusu. Kasi bawu nyonso zole kele na malongi, kasi ba ke kwendaka ntama mingi ve na yawu, mosi na mosi, yina kele bantu ya busantu mpe ba-Calviniste, mpe, ba-Arminien. Ntangu yayi, ba-Calviniste ke na kima ya kieleka. Mu ke kwikila yawu, ti malongi ya ba-Calviniste . . .

³⁷ Mu ke kwikilaka na yayi. Na lukengolo, mu ke kwikilaka ti Dibuundu ke na Lukengolo ya Seko. Konso mutangi Biblia zaba yawu, samu ti Nzambi tubaka yimeni ti Yawu ke talana kuna kukondwa ditona. Ya kele kieleka? Na yina, Yawu ke vwanda kuna. Ya kele kieleka? Bi- . . . Dibuundu kele na kati ya lukengolo ya Seko. Ntangu yayi, beno kele na kati ya Dibuundu, ya kele kima yina ke landa. Kana beno kele na kati ya Dibuundu, mbote, beno kele na kati ya lukengolo na Dibuundu, kasi beno fwana kangama na kati ya Dibuundu. Mpe wapi mutindu beno ke kota na kati ya Dibuundu? Na kupesaka maboko? Ve. Na kutulaka nkumbu na kati ya buku? Ve, tata. “Na nzila ya Mpeve mosi beto nyonso kele ya kubotika na kati ya Nzutu.” Mpe Nzutu yango, yina Nzambi fundisaka na Calvaire, vwandaka Nzutu ya Yesu Klisto, mpe beto kele ya kubotika na kati ya Nzutu yango na nzila ya Mpeve mosi. Beto ke na Lukengolo ya Seko ntangu nyonso yina beto kele na kati ya Nzutu ya Klisto, kima ve lenda kabula beto, kima ve ke simba beto. Kana beno kubasika, beno mosi ke basika na nzila ya luzolo ya beno mosi. Kasi kaka kieleka, kana beno kele na kati ya Nzutu ya Klisto, kieleka kaka mutindu Yesu kuvumbukaka na lufwa, beno mpe ke vumbuka. Nzambi kusalaka yawu yimeni. Yandi . . .

³⁸ Beno lenda ve kusumuka. Oh, beno ke sala . . . mu lenda vwanda musumuki na meso ya beno, kasi kana mu kele na kati ya Klisto, Nzambi ke mona yawu ve, samu ti masumu ya yandi ke katulaka masumu . . . Menga ya Yandi ke katulaka masumu ya munu kuna. Beno me mona? Mu lenda sumuka ve. “Yandi yina kele ya kubutama na Nzambi ke salaka disumu ve, samu ti yandi lenda ve kusumuka. Nkuna ya Nzambi kele na kati ya yandi.”

Beno me mona? Yandi, yandi ke sosa na, kana yandi sala foti, kieleka, yandi kuna kieleka ke sosa na kufunguna disumu yina. Kana yandi kele Muklisto ya kieleka, yandi ke sala yawu. Kana yandi bumba yawu, yandi ke lakisa ti yandi kele na kima ve, na kubanda. Ya kele kieleka. Yandi ke na kima ve, na kubanda. Kasi kana yandi kele Muklisto ya kieleka. . .

³⁹ Kaka awa, beno kunda mbuma ya blé na kati ya ntoto, ya ke vwanda ntangu nyonso mbuma ya blé. Ba-grateron lendaka zunga yawu nyonso, mpe nyonso yankaka, kasi ya ke vwanda mbuma ya blé ntangu nyonso yina yawu ke vwanda. Ya kele kieleka? Mpe kana muntu kele kieleka ya kubutama na Mpeve ya Nzambi, yandi kele ve na kati mpe na ngaanda, mpe ke vutuka mpe nyonso yina, mpe kuna na ngaanda na yinza mpe na ngaanda awa. Ve, tata. Ve, ve. Beno kele ve grateron kilumbu mosi mpe mbuma ya blé kilumbu yankaka. Nzambi kele na yawu ve na kati ya bilanga. Yinga, tata. Kana beno kele ya kubutama na Mpeve ya Nzambi, beno kele Muklisto kubanda ntangu yango tii. . . tii beno ke kwenda, mpe kuna beno kele—beno kele yina ke kufwaka ve, na Nzambi. Ya kele kieleka, kana beno kele na kati ya Dibuundu.

⁴⁰ Ntangu yayi, ntangu yayi bika beto kuzonzila na yina me tala dyambu ya lufwa. Ntangu yayi, wapi mutindu muntu yina kele na kitezo yina, na kati ya mutindu ya mutindu yina, lendaka vwanda dyaka na kimbevo? Samu ti nzutu yango me vulusa ntete ve. Nzutu ya beno me vulusa ve. Ata yinki mutindu, beno kele mbote, mpe beno kele ya santu, mpe beno kele ya kusantisama, mpe lutangu ya Mpeve-Santu beno kele na yawu, ya kele kaka moyo ya beno. Mpe moyo ya beno kele ya kufuluka ntete ve. Ya kele kaka na Lusakumunu, nsilulu ya Nzambi, yina kele lufutu ya mpulusu ya beto. Kasi ntangu yayi kana beto kele na lufutu ve samu na mvumbukulu, ata kubeluka ya Bunzambi ve, na yawu mu ke vwanda na ata kivuvu ve to kima ve samu na kusiamisa ti ya kele na mvumbukulu.

⁴¹ Kaka mutindu kana Klisto vwanda zinga na kati ya ntima ya munu ve, kana mu zolaka baka yawu katuka mutindu mosi ya kima ya psychologie ya ntama kuna, mu fwana kukwikila kisika mosi mutindu yina, mbote, kuna mu—mu—mu ke vwanda mwa na maketi-ke ti na yawu. Mpe ya kele samu na yina, kuna na Afrika, ntangu ba vwanda kwiza, awa me kwiza ba-missionaire, na kunataka mafunda ya bantu ya kuna, mpe ba vwanda nata mwa biteki ya ntoto ya ntama mpe bima nyonso yankaka yina, ya kele samu ti bawu kuwaka kaka lweka ya mayela ya Biblia. Ya kele kieleka. Mpe dibuundu ya munu mosi kele ba-Baptiste, ba-Methodiste, ba-Presbyterien, nyonso me kota kuna. Kasi ntangu ba monaka ngolo ya Nzambi kumonika, yina sukisaka yawu, kuna ba zabaka ti Nzambi kele Nzambi.

⁴² Kasi, ntangu yayi, yinki ke salaka kimbevo yayi kubanda? Ntangu yayi, kima ya ntete, ya kele mpeve ntete yawu kubanda

kimbevo, kaka mutindu mosi beno vwandaka mpeve ntete beno kuma muntu. Ntangu yayi mu ke baka Mpangi Willett awa mutindu mbandu. Mpangi Willett, mu . . . Ya vwandaka na ntangu nge na munu vwandaka kima ve. Mpe kuna kima ya ntete, Nzambi me pesa beto luzingu. Mpe bika beto baka, tuba, kana mu tala na nzutu ya nge na manima ya midi yayi, nge kele ya kusala na nkonga ya ba-cellule, ya kusimba kintwadi na ba-atome. Mpe ntangu yayi, kilumbu ba-atome yango ke kufwa, kana Yesu me vutuka nswalu ve. Nge ke vutuka. Ba ke vutuka kaka mutindu ba vwandaka na mbandukulu, ba ke vutuka na kati ya mupepe. Kasi na ntangu mpeve ya nge ke vutuka, ba-atome yango ke vukana dyaka na mpeve yayi mpe ke basisa Mpangi Willett kaka mutindu yandi yina, kaka ntwenya, ntangu yandi vwandaka na bumbote ya yandi.

⁴³ Ntangu muntu ke lutaka na kutala bamvula makumi zole na tanu, yandi ke tala mifutu na yisi ya meso ya yandi, mpe mwa bansuki kubanda kukuma mpembe. Ya kele, samu ti lufwa kele na manima ya beno. Mpe mosi ya bilumbu yayi yawu ke kwiza baka beno. Ata nani beno kele, yawu ke kwiza baka beno. Kasi yawu malembe-malembe. . . Beno ke fyetama na lweka awa, mpe Nzambi ke basisa beno na lweka yango, mpe beno ke fyetama na lweka *awa*, lufwa na kutala ke kuzwa beno, mpe dyaka awa, kasi na manima ya ntangu fyoti yawu ke kuzwa beno. Kasi kuna, yinki lufwa lenda sala, yawu ke baka kisika ya yawu nyonso, mpe kuna . . . na yina yawu ke sala nyonso yina yawu lenda sala. . . Ntangu Nzambi kupesaka beno luzingu yayi, mpe beno vwandaka na bumbote ya beno, na kutala na bamvula makumi zole na tatu, ntangu beno ke vutuka na mvumbukulu ya mafwa beno ke vutuka kaka mutindu beno vwandaka ntangu beno vwandaka na mvula makumi zole na tatu, bamvula makumi zole na tanu, ntete lufwa kubaka kisika. Lufwa ke kuzwa nyonso yina yawu lenda sala. Yawu ke baka kisika na kati kuna, kasi beno ke vutuka kaka mutindu beno vwandaka.

⁴⁴ Ntangu yayi, kana mosi na mosi ya ba-cellule ya beno—ya beno na kati ya nzutu ya beno, bika beto kutala yawu ntangu yayi, beno kele cellule na cellule, cellule na cellule, kana beno kukabula yawu awa na zulu ya kisika ya kulonga, nzutu ya beno cellule na manima ya cellule, beno ke kuma na mwa nkuna mosi ya fyoti kisika beno kubandaka, yina lenda ve kumonana na disu ya muntu. Beno fwana kutala yawu na nzila ya maneti yina ke kumisaka kima nene. Mu monaka nkuna ya luzingu na nzila ya microscope. Yawu kutalanaka mutindu mwa singa mosi ya fyoti. Mpe kima ya ntete yina ke bandaka kele mukongo, ya kele mutindu mwa dizita. Ya kele mwa cellule ya ntete yina ke bwelamaka na zulu ya cellule mosi.

⁴⁵ Ntangu yayi, kana mu fwana baka mwa cellule kaka mosi yina konso ya beno kukatukaka, mwa cellule mosi ya fyoti, nkuna. . . Yinki kele nkuna? Nkuna kele mwa cellule mosi ya

fyoti, ya kulutila fyoti. Mbote, yinki kele na manima ya yawu? Ntangu yayi, mu me tala konso kitini ya beno, tii na mwa cellule mosi yayi, kasi mu me tala beno ntete ve. Mu ke kaka na ba-cellule ya beno ya kuvwanda kuna. Mbote, na manima, kima yina ke landa, ba-cellule ya menga, mpe ba-cellule ya nsuni, mpe nyonso yina ya kele, me tula yawu nyonso na ngaanda awa, kasi mu me kuzwa beno ntete ve. Ntangu yayi, mu ke na kukuma na nkuna mosi ntangu yayi. Mbote, mu ke kabula na bitini mwa cellule yayi. Ntangu yayi, wapi kisika beno kele? Luzingu ya beno. Mpe luzingu ke salaka cellule ya ntete, yina kele nkuna, na manima nyonso na manima ya luzingu ya yawu; yimbwa na manima ya yimbwa, ndeke na manima ya ndeke, muntu na manima ya muntu. Ba-cellule ke kulaka, cellule na zulu ya cellule, cellule na zulu ya cellule, tii kukuma na kisika beno kele, muntu ya moyo, na nzila ya ba-cellule yina ke kulaka. Ntangu yayi, yina kutumamaka na Nzambi na kuvwanda mutindu yina.

⁴⁶ Kasi, ntangu yayi, yinki na yina me tala cancer? Bika beto kuzonzila na yandi mwa fyoti. Ntangu yayi, Nzambi kupesaka beno luzingu ya beno. Mpe beto tuba, awa beno kele bubu yayi, awa mu kele, ya kele—ya kele na kima ve na diboko ya muni, kasi ya lenda vwanda na cancer na diboko ya beno ntangu mosi. Mbote, wapi mutindu cancer yango me kuma kuna? Bika beto kumona yinki cancer yango kele, ntangu yayi bika beto kukabula yandi na bitini, bika beto kubaka yandi. Ntangu yayi, yandi kele nkonga ya ba-cellule, mpe. Beno vwanda zaba yawu? Kuvimba, cataracte, mosi na mosi ya bima yina kele ba-cellule. Ba kele na nzutu ve. Bayankaka ya bawu ke tandanaka, mpe bayankaka ke talana mutindu nkala-bumi, mpe bayankaka ke monanaka . . . ke sala basinga, cancer ya mbwaki, kaka mutindu basinga ya yinda ya mbwaki yina ke lutaka na . . . Mpe dyaka ya kele na cancer ya rose yina ntangu mingi ke kwizaka na zulu ya dibene ya kento, ya kele mutindu ba-crêpe na zulu ya yankaka, mpe kuna bawu ke tandana. Mpe bawu ke kula bisika nyonso.

⁴⁷ Bantangu yankaka bakuvimba kele na mutindu ve, mutindu yayi, yinda, ya kulala, mpe nyonso. Ba kele na nzutu ve, samu ti ba kele na manima ya mpeve yina kele na nzutu ve. Kasi ya kele ba-cellule yina ke kulaka. Ya kele nkonga ya ba-cellule kuna, beto tuba, na beno malu-malu yayi kele na kuvimba to cancer, ya kele ba-cellule ke kulaka, ke kulaka, ke kulaka, ke kulaka. Yawu ke na kudya, ke na kunwa na nzila ya beno luzingu ya beno. Yawu ke na kuzingila na nzila ya menga. Ba-cataracte ke bakaka maza ya kati ya disu mpe ke kula kaka na zulu ya yawu, ke fuka yawu mosi na zulu, ke kufwa meso ya beno. Bayankaka ya bawu ke kwiza mpe ke kuzwa ata mbala mosi ve. . . mutindu koso-koso ya menga, yina ke kwizaka kaka na mwa nkuna ya fyoti. Ya kele na kima ve ya kutala na nene ya yawu. Nene ya nkuna yina ke sala nzawu, ke sala ntunga. Beno me mona? Kima ve na yina me tala nene ya nkuna.

48 Mpe bayankaka ya bawu ke baka mutindu ya nzutu, bayankaka ata mbala mosi ve. Mpe bayankaka ata mbala mosi ve ke kwendaka na kati ya ba-cellule. Bayankaka ke kuma mpeve, ke pesa mpasi na moyo. Beto ke meka na kutala kitini yina, mu ke bika kitini yango samu na mbasi na manima ya midi, kana mu lenda, wapi kisika mpeve ya moyo yayi ke katukaka, mpe wapi mutindu yawu ke kukotaka *awa*.

49 Mpe ntangu yayi, bampangi, mu ke na kutubaka yayi landila mwa mutindu ya psychologie ve. Mu ke tadila na bampeve ya yimbi ya me kuma bamvula mingi, mpe beno zaba yawu. Kana beno zabaka kaka yinki ya kele, na manima balukutakanu me manisa na nkokila, yinki ke lutaka ntangu yankaka. Beno zaba ve. Beno bambuka moyo, ntangu beno ke teleminaka mpeve, beno fwana zaba yinki beno ke na kuzonzila. Beno telama kaka kuna ve mpe kulandila, samu ti ya ke sala ata mbote ve. Kasi ntangu kieleka mpeve ya yimbi fwana kutumama na beno, yandi ke bakula yawu. Ya kele ve mutindu na ngolo beno ke looka, ya kele ve lutangu ya mafuta beno ke tula. Ya kele yina kele na manima awa yina yandi ke bakula, Kieleka. Yesu tubaka kaka na yandi, “Basika.”

50 Beno bambuka moyo, bilandi vwanda sala makelele mpe kunwana na nyonso, mpe vwanda meka na kubasisa yandi, mpe nyonso. Ba tubaka, “Samu na yinki beto me lenda ve na kubasisa yandi?”

Yandi tubaka, “Samu, na kukondwa lukwikilu ya beno.”

51 Yandi tubaka, “Basika na yandi.” Mwana ya bakala kubwaka mpe kuzwaka kubela yina yandi kuzwaka ntete ve. Beno me mona? Beno me mona? Ba bakulaka lutumu.

52 Beno tala bana ya babakala yina kuna, bayina vwanda yenga-yenga yina monaka Paul kubasisa bampeve ya yimbi. Bawu tubaka, “Beto lenda sala kima mutindu mosi,” bana ya babakala ya nganga-Nzambi mosi. Na yawu ba kwendaka mpe vwanda tuba, “Beto lenda basisa bampeve ya yimbi.” Actes 19. Ba kwendaka na muntu yina vwanda bela kimbevo ya nzyeta, mpe bawu tubaka, “Beto ke zabisa nge, na nzila ya Yesu. Basika na yandi. . .” Mpeve ya yimbi tubaka, “Ntangu yayi. . .” “. . .na Nkumbu ya Yesu, yina Paul ke longaka!”

53 Mpeve ya yimbi tubaka, “Ntangu yayi, mu zaba Yesu mpe mu zaba Paul, kasi beno kele banani?” Beno zaba yinki kusalamaka. Yandi kubwaka na zulu ya bantu yango, pasulaka bilele ya bawu, mpe bawu mosi kuzwaka kimbevo, mpe vwanda kima na bala-bala.

54 Bampeve ya yimbi mosi yango kele moyo bubu yayi, na yawu ya kele na bufanatiki mingi. Yayi kele dibuundu, na nkokila yayi. Ya kele na bufanatiki mingi na yinsi bubu yayi, yina ba ke bokila kubeluka ya Bunzambi, yina ba zolaka kangisa yinwa. Ya kele yina ke nataka nsoni na zulu ya Dyambu ya kieleka. Ya kele

samu na yina beno ke na mpasi mingi. Ya kele na bima mingi yina ba ke na kubokila lukwikilu, bubu yayi, yina ba zolaka kangisa yinwa. [Kisika ya mpamba na bande—Mu.] Kima yankaka ve kasi binzambi-nzambi! Ya kele yina ke na kusala Dibuundu ya kieleka ya Nzambi kuzwa mpasi mingi na yawu. Kasi beto kele Amerique, beno me mona, ya kele mutindu ya fwana vwanda. Nzambi tubaka ti blé mpe matiti yina ke tambulaka mpe bayinti ya bansende ke kula kintwadi. Beno meka ve na kukatula bawu. Beno bika bawu kukula kintwadi, kasi na bambuma ya bawu beno ke zaba bawu. Ya kele na bambuma ve, samu na yinki, ya kele na Luzingu ve, kuna ya kele na kima ve.

⁵⁵ Ntangu yayi, beno tala mbote cellule yayi. Ti beto tuba, mutindu, mutindu ntangu mingi, cancer ya mbwaki bambala mingi ke kwendaka vwanda na kibutulu ya kento, na bampasi ya kento mpe nyonso yina. Ntangu yayi ti, bika beto kubaka yawu, muntu yango na yisi ntangu yayi, na cellule ya yandi, cancer yayi—yayi. Ntangu yayi cancer . . .

⁵⁶ Kima nyonso na kimuntu kele kifwanukusu ya kimpeve. Beno zaba yawu? Kima nyonso na kimuntu kele kifwanukusu ya kimpeve, ata nyonso yina ya kele.

⁵⁷ Mutindu, mutindu yayi, ntangu—ntangu beto kele ya kubutama na kati ya Nzutu ya Klisto, ya kele na bima tatu yina ke salamaka samu na kunata Mbutukulu ya beto. Mpe ya kele bima tatu yina basikaka na luzingu ya Klisto ntangu Yandi kufwaka. Yina basikaka na nzutu ya Yandi, maza, Menga, Mpeve. Ya kele kieleka? [Dibuundu me tuba, “Kieleka.”—Mu.] Bima tatu, ya kele na bima yango beto ke lutilaka ntangu beto ke butukaka ya mala-malu: lunungu, busantu, mbotika ya Mpeve-Santu. Ntangu yayi, yina lenda nyonso kusalama na kusalu mosi. Kasi ya ke bakaka . . . Kasi beno lenda vwanda na kitezo ya kunungisama kukondwa beno vwanda ya kusantisama. Beno lenda kwikila na Mfumu Yesu Klisto mpe dyaka kulandila na mvindu ya beno. Kasi beno lenda kieleka kuzinga na kati ya nyonso zole kuvedila mpe luzingu ya santu ya kuvedila, mpe kukondwa Mpeve-Santu. Beno me mona, Biblia, na Jean ya Ntete 5:7, me tuba, “Ya kele na bambangi tatu na Mazulu, Tata, Mwana, mpe Mpeve-Santu, mpe . . . Tata, Ndinga, mpe Mpeve-Santu,” yina vwandaka Mwana, “mpe bawu tatu yayi kele mosi. Mpe ya kele na bambangi tatu na ntoto, masa, Menga, mpe Mpeve, mpe bawu kele ya kundima na mosi.” Mosi ve, kasi ke ndima na mosi. Beno lenda ve kuzwa Tata kukondwa kuzwa Mwana; beno lenda kuzwa ve Mwana kukondwa kuzwa Mpeve-Santu, samu ti ba ke kabula bawu ve, mosi. Butatu kele na kati ya mosi.

⁵⁸ Mu ke kuwaka yawu awa ve, kasi beno ke kuwaka yawu mingi na yinsi, mosi ya mambu ya kulutila nene na kati ya bankonga ya bantu ya Pentecote, kele muvusu na kati ya mwa kima mosi yina. Mpe mu vukisaka bakuluntu ya bawu kintwadi mpe mu lakisaka bawu ti bawu nyonso zole ke kwikilaka kima

mosi. Ya kele dyabulu na kati-kati ya bawu, kaka yina. Kana dibuundu ya nene yango ya Pantekote lendaka ku... kulosa mwa binkulu ya bawu, ya ntama mpe kuvukana bawu mosi kintwadi na kati ya Dibuundu mosi ya kusakumuna ya Nzambi, Enlevement ke salama. Kasi ntangu nyonso yina Satana ke kanga bawu ya kukabuka, mbote. Yina kele mutindu ya yandi ya kusala yawu. Mpe bawu kieleka ke kwikilaka kima mosi.

Mosi ke tuba, “Mbote, *yayi* kele Yawu.”

⁵⁹ Mu tubaka, “Mbote, kana *yayi* kele Yawu, na yina Yina kele *yayi*.” Na yawu beno bawu *yayi*. Na yawu, ya kele nyonso kima mosi. Kasi beno bawu *yayi*, na kati ya kutala butatu yango ya Nzambi. Ntangu *yayi*, ntangu *yayi*, Nzambi na kati ya Yandi mosi. Nzambi Tata, Mwana, mpe Mpeve-Santu. Ntangu *yayi*, beto ke tubaka ve “banzambi ya beto,” mutindu mimpani. Ya kele “Nzambi ya beto.” Beno me mona? Ya kele butatu ya Luzingu ya Nzambi.

⁶⁰ Ntangu *yayi* beno tala, ntangu *yayi*, Satana kele na kati ya butatu mpe. Mpe bangolo ya yandi kele na kati ya butatu.

⁶¹ Ntangu *yayi*, kasi beno tala na manima ntangu maza, Menga mpe Mpeve ke pesa Mbutukulu ya malu-malu. Ya kele kieleka? Ntangu *yayi* beno tala mbote. Ya kele yina ke lakisa Mbutukulu ya malu-malu. Yinki ke lakisaka mbutukulu na kimuntu ntete Mbutukulu ya mala-malu kusalama? Ntangu. . . Beno bamama, ntangu bébé ke butamaka, yinki kele kima ya ntete? Maza. Na manima, menga. Na manima, beno me mona, ya kele yina ke salaka luzingu, beno me mona, ke salaka muntu. Maza, menga, mpeve.

⁶² Ntangu *yayi*, cancer, bika beto kutala yandi baminuti yina me bikana na beto. Beto kele na baminuti tanu na kutala yina me bikana, mu banza. Na baminuti tanu yina ke landa, bika beto tala cancer. Yinki kele kimbevo yango? Yinki yandi ke monikisa? Yandi kele kibulu yina ke kudyaka bibulu ya kufwa. Yandi ke monikisa ngoy-ngoy, yina ke kudyaka bima ya kufwa. Mpe cancer ke katukaka bantangu mingi, na mpasi, kisika cellule me kuzwa mpasi mpe ya—ya me pasuka. Mpe mwa cellule na kati kuna me vutuka manima. Oh, ya kele mpova ya nene samu na Baptiste, mutindu yina ve? Mbote mingi, kasi yawu ke vutuka na manima, cellule yango. Mu kele Baptiste yina ke kwikilaka na yawu kuvutuka na manima.

⁶³ Muntu tubaka, na yisi awa na lukutakanu ya Arkansas kilumbu yankaka yina, yandi tubaka, “Mpangi Branham,” yandi tubaka. . . Ya vwandaka Nazaréen. Yandi kuzwaka kubeluka. Yandi vwandaka na ya yandi. . . Yandi vwanda tambula mbanza nyonso, na lubota ya yandi na dipeka. Yandi tubaka, “Beni zaba yinki?” Yandi tubaka, “Ntangu mu kwizaka awa mbala ya ntete,” yandi tubaka, “Mu—mu vwanda banza nge. . . kuwaka nge kulonga, mu vwanda banza ti nge vwandaka Nazaréen.”

Yandi tubaka, “Na manima mu monaka bantu mingi kele ba-Pentecotiste, mpe muntu mosi tubaka na munu ti nge kele Pentecotiste. Mpe ntangu yayi nge ke tuba ti nge kele Baptiste.” Yandi tubaka, “Mu ke na kubakula yawu ve.”

⁶⁴ Mu tubaka, “Oh, ya kele mpasi ve.” Mu tubaka, “Mu kele Pentecotiste Nazaréen Baptiste.” Na yawu ya kele—ya kele kieleka. Mbote. Ve, beto kele mosi na kati ya Klisto Yesu, na nzila ya Mpeve-Santu yina ke sala beto mosi. Ya kele kieleka.

⁶⁵ Ntangu yayi, beno tala, mwa cellule yayi ke vutukaka manima ntangu ya kele na mpasi. Ya ke bandaka fyoti. Mwa bankuna yankaka ke kwiza mbala mosi ke pesa luzingu ya yawu na kati kuna. Mpe ya kele yina mafinya ke nataka na mputa. Ya kele mwa bitini ya basoda yina ke nwanaka samu na luzingu ya beno. Ba ke kwenda na mbangu kuna mpe—mpe ke nwanisa poison yango, balulendo ya mpeve ya yimbi yina ke na kumeka—ke na kumekaka na kuvukana na kati kuna, mpe kupesa baluzingu ya bawu. Ya kele yina ke sala . . . Ya kele . . . Ba kele nkonga ya mwa basoda ya kufwa, mafinya yina kele na kati ya menga ya beno . . . yina kele na kati ya—na kati ya mputa, ke pesa luzingu ya bawu samu na kuvuukisa beno.

⁶⁶ Ntangu yayi, mbala mosi mwa cellule ke katuka na kati kuna mpe mpeve ya yimbi yayi ke kota na kubanda, yandi ke banda na kukula, yandi ke banda na kukula samu na kufulusa ba-cellule. Yandi ke tunga nzutu kaka kieleka mutindu babébé ya beno ke bandaka na kati ya mbutukulu ya beno, mpe mutindu beno salaka na kati ya mama ya beno. Cellule na zulu ya cellule, cellule na zulu ya cellule, cellule, mutindu nyonso, kisika nyonso; kaka, ba vwandaka na mutindu ya kima ve mutindu muntu, na manima ya luzingu ya yawu. Ya kele kaka na ngaanda ya mpeve. Yawu ke kula kaka mutindu nyonso, mpe ke banda cellule na zulu ya cellule, cellule na zulu ya cellule.

⁶⁷ Mpe ntangu yayi, kima ya ntete beno zaba, beno ke banda na kulemba mpe kutala mbote ve na nzutu. Beno ke kwenda na dokotolo mpe yandi ke tala beno. Ya lenda vwanda ti yandi lenda ve kutala yawu. Kana yandi kulenda, yandi lenda zenga yawu. Kana yandi lenda zenga yawu mbote, mbote, yandi me kuzwa yawu. Kasi kana yandi kuzenga yawu mbote ve, na manima kana ya kele na kati ya laka to kisika mosi kisika ba lenda zenga mbote ve, mwa kitini mosi ya yawu ke landila na kuzinga. Beno me mona, samu ti ya kele mutindu ve beno ke zenga diboko ya beno mpe me manisa yawu, to kima, to beno ke zenga . . . Yinki mu zola kutuba, kana beno zenga kisika ya ngudi ya nzutu, mpe kubika diboko ya beno kuna, mbote, ya ke zinga ve. Kasi—kasi, beno me mona, yina kele na mutindu ya luzingu ve mutindu yina kele na beno. Ya kele ngolo ya mpeve ya yimbi yina ke na kutambula.

⁶⁸ Mpe ntangu yayi beno tala, beno ke bokilaka yawu, dokotolo ke bokilaka yawu, “cancer.” Nzambi ke bokilaka yawu

“dyabulu.” Beno tala bubu yayi. Ba ke kuzwa kaka yawu... Wapi kisika mpova ya *cancer* kukatukaka? Ya katukaka na... katukaka na mpova ya Latin yina ba ke zonzilaka na banzonzolo ya budokotolo, yina zola tuba “nkala,” nkala yina beno ke monaka na mubu, ya kele na makulu ya yawu nyonso. Ya kele mutindu yina—yina yawu ke kusalaka, yawu ke tandama, ke tsyamuka bisika nyonso. Mpova cancer kele nkala. Mpe yawu ke kota mpe ke landila kaka na kubaka kisika mpe ke kunwa menga na yina yawu ke na kukwenda, mutindu pieuvre to kima mosi. Mbote, kuvimba, cataracte, mpe bimbevo yankaka, konso mosi ya bawu ke katukaka na nkuna, mpe nkuna yango fwana kuvwanda nzutu. Mpe ntete yawu lenda kuvwanda nzutu, ya fwana vwanda luzingu. Ntete yawu kulenda na kuvanga to—to kumena mpe kusala ba-cellule mingi, ya fwana vwanda luzingu. Ya kele kieleka? [Dibuundu me tuba, “Amen.”—Mu.] Ntangu yayi, wapi kisika cancer yango kukatukaka? Nani, wapi kisika ya katukaka? Ya vwandaka na beno awa mwa ntangu me luta, kasi ntangu yayi mu banza ti ya kele na beno. Wapi kisika yawu me katuka? Ya kele luzingu yankaka ya kuswaswana na luzingu ya beno, yina ke na zinga na kati ya beno. Mpe yawu ke kwamisa, ke bebisa luzingu ya beno. Ya kele samu na yina Yesu kubokilaka yawu “dyabulu.”

⁶⁹ Ba ke bokilaka kimbevo ya nzyeta bubu, ba ke tubaka, “nzyeta.” Kasi, nzyeta, na kati ya Biblia, Yesu bokilaka yawu “mpeve ya yimbi.” Ntangu bakala yina kwizaka na mwana ya bakala yina vwanda kubwaka na ntoto, mpe yina mafulu vwanda basika na yinwa, mpe nyonso, yandi tubaka, “Yandi kele na mpeve ya yimbi, mpe bambala mingi yandi ke losaka yandi na tiya, na maza.”

⁷⁰ Ntangu yayi bawu me pesa yawu nkumbu ya mbote mpe ke bokilaka yawu nzyeta, kasi ya kele mpeve ya yimbi. Mpe Yesu tubaka, “Nge mpeve ya yimbi, basika na mwana!” Kieleka. Ntangu yayi, nzyeta bambala mingi ke katukaka na mpasi ya luketo. Mu banza ti beto lenda kutala yawu na mwa ntangu yankaka. Beno me mona? Ya kele yina ke salaka nzyeta, na nzila ya kufuluka ya urée na menga.

⁷¹ Ntangu yayi, beno tala na yayi, na yina cellule yango ke vwanda kuna, ya kele mpeve ya yimbi. Yandi ke na kutunga luzingu; yandi ke na kukula, ke na kukuma ya kulutula nene mpe ya kulutula nene. Yandi kele na kusalu mosi ya kusala, ya kele, kubaka luzingu ya beno. Ya kele samu na yina dyabulu fidisaka yandi, samu na kukumisa bilumbu ya beno nkufi na yisi ya mvula makumi sambwadi.

⁷² Ntangu yayi, mu ke pesa mbote na konso dokotolo. Yinga, tata. Bantu nionso ya medecine, Nzambi kusakumuna bawu samu na lusalusu yina ba ke salaka samu na bantu. Ya kele kieleka. Yinki beno lenda sala na yinza bubu yayi kukondwa yawu? Mu ke tonda Nzambi samu na bantu ya medecine. Mu me

tonda Nzambi samu na ditoma ya munu. Kana Nzambi bikaka ve mayela ya yinza kusala munu ditoma, mu zolaka vwanda na mpasi na kukwiza awa. Samu na minda ya nsula, mpe samu na sabuni samu na kusukula maboko ya munu, mpe dentifrice samu na kusukula meno, kieleka. Mu ke tonda Yandi samu na nyonso, samu ti bima nyonso ya mbote ke katukaka na Nzambi.

⁷³ Kasi beno bika munu kutuba na beno, ya kele na ata nkisi yina me belusaka kimbevo mosi. Mpe ya kele na dokotolo mosi ve, kana ya vwanda ngangwa, kasi dokotolo ya kieleka ke tuba na beno ti bawu lenda kuzonza ve ti ba kele minganga. Kuna na Bampangi ya Mayo, mingi ya beno. . . Ba yufulaka munu kuna, bambala zole to tatu. Samu na bambevo yina katukaka kuna, kukondwa kubeluka. . . Beno me tanga *Reader's Digest*, ya ngonda ya kumi na mosi? Bantu yikwa me tanga yina ya Ngonda ya kumi na mosi, kisika ba me zonzila na kati na munu, na *Reader's Digest*? Beno me mona? Mpe ba bokilaka munu kuna, na kuyufula samu na bébé yina ba fundisaka. Ba tubaka, “Ya lenda salama ve.” Kasi Mpeve-Santu zonzilaka munu mutindu yawu ke salama, mpe yawu kusalamaka. Mbote. Ntangu yayi, ba bokilaka munu kuna. Mpe na zulu ya mwelo kisika Jimmy mpe bayankaka, Mayo vwanda vwanda kuna, ya kele na nsangu mosi ya nene kuna yina ke tuba, “Beto ke zonza ve ti beto kele minganga. Beto ke zonza kaka ti beto ke sadisa yinza. Ya kele na Munganga mosi, yina kele Nzambi.” Ba kele ya kulutila mbote na yinza. Ntangu yayi, beto ke na mwa banganga, inga. Ya kele kieleka. Beto kele na mwa milongi ya banganga, mpe. Mbote. Na yawu, ya kele balweka nyonso zole.

⁷⁴ Beno tala, kasi muntu nyonso yina ke zonza ti yandi kele munganga, yandi kele muntu yina ke bulaka masolo, samu ti yandi lenda ve kusala yawu. Samu ti Biblia ke tuba, “Mu kele Mfumu Yina ke lemvokilaka nyonso masumu ya beno mpe ke belusa nyonso ya bimbevo ya beno.”

⁷⁵ Mu vwanda tanga. Mpe na kati ya kivinga ya munu, . . . badokotolo ya kulutila mbote ya bayinsi vwanda me kwiza. Beno zaba ve yina kele na manima ya luzingu, mpangi, na kuzabaka yinki vwandaka, mpe bima yina mu ke tubaka ve na ntwala ya bantu. Bantu ke kwizaka na mansweki. Kasi beno banza ve ti ya kele dyaka ve na ba-Nicodème na yinza; kieleka ya kele, mafunda ya bawu. Ba ke talaka yawu mpe ke kwizaka na lukutakanu. Ke vwanda kuna ya kulwata T-shirt, kima yankaka mutindu yina, na bankumbu ya nene ya mutindu yankaka yina ke yitukisa beno, ke vwanda na lukutakanu. Na mwa bilumbu na ntwala mpe ba ke kwiza na mansweki, mpe ke fidisa muntu samu na kulomba kukutana. Mpe ke tuba mbala mosi kaka, ke tuba, “Mpangi Branham, mu ke kwikila ti Ya kele Kieleka.” Ba kele bantu mutindu kaka beto kele mpe. Kieleka. Mpe muntu nyonso zola kutala na manima ya mwela ya ndombe kuna kisika yandi ke lutila kilumbu.

76 Kasi ba-cancer yayi mpe bima yayi kele kieleka bampeve ya yimbi yina ke bakaka nzutu na nsuni ya muntu, ke landila nzila, ke baka luzingu ya beno.

77 Ntangu yayi, kana mu zola kusala mutindu dokotolo, kana mu lendaka zenga yawu, kutula yawu na ntoto... To, kaka mutindu, beto tuba, mutindu ti, beno vwandaka cancer, beno mosi, na zulu ya ntoto yayi. Ntangu yayi, awa kele kubeluka ya Bunzambi. Kana mu vwanda zola kukatula beno na mutindu ya nzila ya dokotolo, mu ke landila kaka... kukalata nzutu ya beno, to kima yankaka, tii yawu ke katuka kaka nyonso na yinza. Ya ke vwanda na kima mosi dyaka ve ya yawu, kaka mutindu dokotolo ke katulaka yawu na beno. Kasi na mutindu ya kubeluka ya Bunzambi, kana beno vwandaka cancer, mu ke bokila kaka luzingu ya beno na kubasika na beno, mpe beno ke landila. Luzingu ya beno lenda bika beno, kasi nzutu ya beno ke vwanda awa mutindu kaka ya vwandaka.

78 Ntangu yayi, ya kele kisika meso mpe ntangu kele mbeni ya kulutila yimbi samu na Nzambi na kubeluka ya Bunzambi. Mu zaba ntete ve kana Mpangi Baxter me tubaka ntete na bima yayi na lukutakanu. Mu ke vwandaka, ke bangula yawu na yandi mpe Mpangi Bosworth, bambala na bambala na bambala. Kasi beno tala yinki ke salamaka. Mu ke na maketi-keti ti bantu mingi kubakula yawu, samu ti, na manima ya mwa ntangu, beno ke tala bantu kuvutuka, kutuba, “Mu kuzwaka kubeluka ya munu, Mpangi Branham, bilumbu zole to tatu, kasi, nkembo na Nzambi, yawu—yawu me bika munu.” Mpe mu me bakula yawu, mpe mu banza ti ya kele samu ti bawu ke bongisaka ve lukutakanu mbote. Bantu ke bakulaka ve. Mu kuzwaka bantu yina kwizaka na kisika ya malongi mpe yina vwandaka kieleka ya kufwa meso, ba-cancer, to ba-cataracte na zulu ya meso ya bawu, mpe kutanga Biblia yayi na manima ba me sambila bawu, ke kwenda; na manima ya bilumbu tatu to yiya kuvwanda dyaka na meso ya kufwa mutindu bawu vwandaka ntete. Yinki kusalamaka? Muntu nyonso zaba ti ntangu luzingu me basika na nsuni, yawu ke fiotuka na manima ya ntangu fyoti. Ya kele kieleka?

79 Muntu, awa, me kufwaka ntete mbambi, to ngombe ya kento, to kima ya mutindu yina? Kieleka. Mbote. Beno ke tula yawu na kitezolo na nkokila yayi, beno bikubudi awa, bampangi ya munu. Beno kufwa mbambi mpe beno tula yandi na kitezolo, beno tuba na bampangi lutangu ya bakilo ya yandi. Beno sala keba! Na suka yandi ke kuma bakilo mingi fyoti kulutila na yina yandi vwandaka. Ntangu muntu ya moyo ke kufwaka, mfumu ya yinzo ya bamvumbi, kima ya ntete, yandi ke katula meno ya luvunu to disu, nyonso yina kele kuna, yandi ke katula yawu; samu ti, yawu ke patama, yawu ke kubwa samu ti nzutu ya muntu ke patamaka. Nsuni nyonso yankaka ke patamaka. Ntangu luzingu me basika na cellule, yawu ke banda na kukuma fyoti, ke patama. Yawu

ke sala mutindu yina na kutala bangunga makumi sambwadi na zole. Mpe na manima yawu ke banda na kuvimba. Beno bika ba dyata mwa yimbwa, na ngaanda awa na nzila. Beno bika yandi kulala kuna na mwini na kutala bilumbu tatu, mpe beno tala mbote yinki ke salama. Yandi kele yimbwa mosi ya nene mingi kulutula yina yandi vwandaka ntete. Yawu me vimba. Ya kele kieleka? [Dibuundu me tuba, “Amen.”—Mu.]

⁸⁰ Mbote, ya kele kima mosi yina ke salamaka ntangu ba me basisa mpeve ya yimbi na muntu ya kubela. Na bilumbu ya ntete, “Oh, mu ke na kutala mbote.” Na manima kubanda kutuba, “Mu kele—mu kele ya kubela kulutula na yina mu—na yina mu vwandaka ntete. Mu me zimbisa kubeluka ya munu.” Kaka mutindu kieleka lukwikilu ke basisaka yawu, ntembe ke vutula yawu mbala mosi dyaka. Mutindu lukwikilu ke kufwa yawu, ntembe ke vumbula yawu. Yesu tubaka, “Ntangu mpeve ya yimbi me basika na muntu, yandi ke kwenda na bisika ya kuyuma mpe yandi ke vutuka na bampeve sambwadi yankaka ya yimbi.” Mpe kana muntu ya mbote ya yinzo kele ya kutelama ve kuna samu na kukengila mwelo yina, yandi ke kwiza mbala mosi kukota. Mpe muntu ya mbote ya yinzo ya beno kele lukwikilu ya beno. Beno tuba, “Vwanda ntama!” Kaka yina.

⁸¹ Kana ntangu yayi beno ke mona muntu ya kubela yina me beluka, na mutindu nyonso, kana ya kele kimangu ya ngitukulu ve. Na kutala, kubeluka ya Bunzambi mpe kimangu kele bima zole ya kuswaswana. Kubeluka ya Bunzambi, kima mosi; kimangu kele kima yankaka. Kasi na mutindu ya nene ya kubeluka ya Bunzambi, ntangu ba me basisa mpeve ya mvindu, mpeve ya yimbi ya cancer, ntangu yawu ke katukaka muntu, “Oh!” Ntangu yayi, to beto tuba ti beto ke baka kima samu beno lenda na kumona mbote-mbote, mu ke tuba, cataracte. Yinki kusalamaka ntangu muntu yina. . . Kana beno tala muntu ya kufwa meso. Mu zaba ve kana mu me kuzwaka ntete mosi awa, to ve, ya meso ya cataracte. Mu ke bika bawu kutelama mwa baminuti fyoti. Samu na yinki? Samu kupatama yango kubanda na kusala. Beno tuba na bawu na kuvutuka, samu na kupesa beto kimbangwi. “Oh, la la!” Ba lenda mona mbote-mbote. “Oh, la la! Kaka, mu lenda mona bima! Yinga! Mu. . .” Yinki kele dyambu? Luzingu me kwenda; nzutu ya cataracte ke na kupatama. Mbote, ya ke sala mutindu yina bilumbu zole. Beno ke tuba, “Oh, mu ke na kutala mbote mingi.”

⁸² Mpe na manima ya mwa ntangu, ba ke banda na kutala mpasi na yintu, ke tala nzutu mbote ve. Ke telama suka yina ke landa, “Mu ke na kuwombisa kumona ya munu dyaka.”

⁸³ Ndambu ya bawu ke tuba, “Uh-huh, ba me vuna kaka nge. Nkonga ya ba-exalté yina me vuna nge.” Beno kwikila yawu ve! Yina kele luvunu ya dyabulu. Kana beno kwikila yawu, beno ke vutuka mbala mosi dyaka na meso ya kufwa.

Kasi kana beno tatamana kaka, beno kutuba, “Ve. Mfumu, mu ke kwikila.”

⁸⁴ Na manima yinki ke salama? Nzutu yango ke vimba mwa ntangu mingi. Yawu ke fuka kumona yango dyaka. Cancer yango na kati ya nzutu ke vimba. Beno ke banda na kutala mpasi mpe kumona mpasi dyaka. Na manima beno ke bela ya kulutila, kieleka kubela. Samu na yinki? Nsuni ya kufwa ya nene ya kuvimba na kati ya beno kele kuna, ya kufwa.

⁸⁵ Beno ke vutuka, na dokotolo mpe yandi ke tuba, “Oh, yina kele buzoba. Ya kele dyaka na cancer kuna. Mu lenda mona yawu.” Kieleka, ya kele kuna, kasi ya kele ya kufwa. Alleluia!

⁸⁶ Ntangu yayi, menga fwana vedisa nzutu. Konso ntangu ntima ke bulaka, yawu ke fidisaka menga na nzutu nyonso, mpe yawu ke lokuta sambukila yango. Kieleka, yawu ke belisa beno. Yinki kana beno vwandaka na ndambu ya musuni na kati ya beno kisika mosi, to yinda mutindu nyoka, to kima nene mutindu musapi ya beno, mpe yina kele na kati kuna, mpe ya kele ya kufwa, lutangu ya musuni yango ya kufwa na kati ya beno, mpe ya ke na kupolaka? Mbote, kieleka, menga ya beno fwana bumba yawu ya kuvedila, na yina yawu ke bula na kulutaka. Kasi ya kele nzutu ya kufwa, kima yina kele kuna, samu ti luzingu me basika na yawu. Ngolo ya Nzambi, na nzila ya lukwikilu, me nata yawu na ngaanda. Yandi kele mpeve ya yimbi; yandi fwana kwenda.

⁸⁷ Kasi, dyambu, bantu kele ya kulonga ve. Bawu ke kwenda, ke bika. Mpe mpeve ya yimbi yina ke telama kaka kuna, samu na kuyala dyaka. Ntangu Nzambi ke tubaka na beno kima na zulu ya plate-forme yayi, na nzila ya Mpeve ya Yandi, na yisi ya kimpeve, beno sala ntembe na yawu ve, to kima ya yimbi ke kwiza na zulu ya beno, Yandi tubaka. Samu ti Yesu tubaka, “Mavimpi ya muntu yina ke lutila bambala sambwadi yimbi na yina ya vwandaka ntete.” Ya kele kieleka? Ntangu mpeve ya mvindu ke basikaka na muntu, yandi ke kwendaka na bisika nyonso ya kuyuma, ke vutuka na bampeve sambwadi yankaka ya yimbi. Na yawu, beno sala ntembe ve. Beno telama kaka na Yawu. Beno ndima yawu, katuka ntima ya beno. Beno tuba, “Ve, tata! Mu ke ningana ve! Ata yinki mutindu kubela mu ke vwanda, yina kele na kima ve ya kusala na yawu.” Kuna, kima ya ntete beno zaba, beno ke banda na kutala mbote. Nyonso ke vwanda mbote kuna. Beno me mona, ya kele ya kufwa. Kupasula yina dokotolo katulaka na beno, kuvimba mosi yina kele na kati ya beno, na ata luzingu na yawu.

⁸⁸ Beno ke tuba, “Luzingu na kati ya yawu, Mpangi Branham, yawu ke baka luzingu ya munu?” Ve, tata. Luzingu yina kele ya kukabuka na luzingu ya beno. Mu vwanda me lakisa kaka na beno ti beno kele luzingu yina me kuma moyo, mpe yawu kele luzingu mpe me kuma moyo; mpe beno kele ya Nzambi, mpe yawu kele ya dyabulu. Beno me mona yinki mu zola tuba?

Bampeve ya yimbi. Ntangu yayi, beno fwana mona wapi mutindu kima yango kele ntangu beno ke telama mpe kutala yawu.

⁸⁹ Oh, la la, lemvo, ya me kuma na kutala bangunga kumi na tanu. Lemvo. Beno tala, bampangi. Oh, yina yinza yayi kele na nsatu!

⁹⁰ Mu vwanda me baka na kutala bamvula sambwadi, na kulonga bisika nyonso na Amerique, na kusalaka balukutakanu yayi ya kubeluka ya nzutu. Mu zola mbote kuvutuka na yinsi nyonso, samu na kulonga Biblia, mpe na zulu ya bampeve ya yimbi, mutindu bantu lenda bakula yinki ya kusala. Mpe ya kele samu na yina, bawu ke kwendaka na balukutakanu yayi, bambala mingi, mpe, muntu. . . Kana beno me bakula ve, bantu ke basika, mpe bambala mingi. . .

Ntangu yayi, beno me bambuka moyo na muntu yina kwizaka mpe tubaka ti yandi vwandaka na dikabu ya kubelusa ya Bunzambi? Dikabu ya kubeluka ya Bunzambi vwandaka na kati ya beno kana beno kubelukaka. Ya kele beno, mosi. Konso dikabu ke salaka na nzila ya lukwikilu. Mpe ata lutangu ya dikabu ya kubeluka ya Bunzambi yina kele na munu, mu ke kwikila yawu na ntima ya munu nyonso, kasi beno lenda telama awa mpe, kana beno kele ve na mutindu mosi ya lukwikilu, ya ke sala beno ata mbote ve. Mu lendaka sambila samu na beno, bangunga mpe balumingu mpe bangonda. Ya kele ve milongi na kubeluka ya Bunzambi. Ya kele beno yina kele na dikabu ya kubeluka ya Bunzambi, yina ke kwikila na kuvwanda ya kubeluka, samu ti ya kele na nzila ya lukwikilu. Na nzila ya lukwikilu! Konso kusala ya Nzambi kele na nzila ya lukwikilu.

⁹¹ Kinwanunu nyonso ya Nzambi kele na nzila ya lukwikilu. Beto kele na kima mosi ya yinza ve. Nyonso ya dibuundu ya Klisto kele kisalu ya lukwikilu. Beno tala kinwanunu ya Nzambi, luzolo, nsayi, kizunu, mvibudulu, bumbote, lembami, kusalasana, kukanga-ntima. Ya kele kieleka? Nyonso kele ya kimpeve, kima ve kele ya yinza. Na yawu beto ke talaka ve na bima ya yinza, samu ti kisalu ya beto kele na kimpeve. Mpe mutindu kaka beto lenda vwandisa yawu, kele lukwikilu, ya kele na yina Nzambi tubaka vwandaka Kieleka, mpe beto ke tala na yina ke Monanaka ve. Mpe beto ke bokilaka bima yango yina kele ve, mutindu ti yawu kuvwandaka; mutindu Abraham kusalaka, mpe kuzwaka yawu. Amen! Abraham kubokilaka bima yango yina vwandaka ve, mutindu Nzambi, mutindu ti yawu vwandaka. Na kuvwandaka na bamvula nkama, yandi salaka ntembe ve na nsilulu ya Nzambi.

⁹² Mu lenda kaka kutala yawu, beno ve? Kumona Sara kutelama suka mosi. Nzambi me tuba, “Abraham!” Yandi me tuba, “Abraham, nge ke kuzwa mwana ya bébé.”

93 Sara me telama. Yandi me tuba, “Wapi mutindu nge ke na kutala nzutu, Sarah?” Yayi kele nkonga ya bantu nyonso, kasi beno kuwa.

“Ata luswaswanu.”

94 “Mbote, nkembo na Nzambi, beto ke kuzwa yandi! Kwenda baka ba-couche mpe bapengele, mpe nyonso. Vwanda ya kuyilama.”

Mbote, ngonda yankaka me luta. “Sarah, wapi mutindu nge ke na kutala nzutu?”

“Ata luswaswanu.”

Mvula me luta. “Sarah, wapi mutindu?”

“Ata luswaswanu.”

Bamvula kumi me luta. “Ata luswaswanu.”

Bamvula makumi zole na tanu me luta. “Ata luswaswanu.”

95 Abraham, na kisika ya kulemba, yandi vwandaka na ngolo na kulutila ngolo. Yandi zabaka ti ya ke vwanda ya kulutila kimangu ntangu nyonso, samu ti yandi kwikilaka na Nzambi, mpe ti yandi kusala ntembe ve na nsilulu ya Nzambi. Yandi tubaka, “Beto ke kuzwa yandi!” Mpe nsuka mosi kivumu ya Sarah me banda na kuvimba, mpe mwa Isaac me butama, samu ti Abraham kwikilaka Nzambi. Mpe yandi talaka na bima, mpe talaka bima yango yina vwandaka ve mutindu ti ya vwandaka.

96 Ve na nzila ya bakutala ya nzutu, ve na nzila ya kumona. Beno ke tambula ve na nzila ya bakutala ya nzutu to ya kumona. Ya kele na nzila ya lukwikilu. Mpe ntangu Nzambi me zonza kima, tubaka, “Bima nyonso yina beno ke lombaa, ntangu beno ke sambila, beno kwikila ti beno ke kuzwa yawu,” na yawu beno telama kuna. Nzambi tubaka yawu, ya fwana vwanda mutindu yina! Amen. Bampeve ya yimbi!

Lukwikilu na Tata, lukwikilu na Mwana,
Lukwikilu na Mpeve-Santu, tatu kati na Mosi;
Bampeve ya yimbi ke tekita mpe misumuki ke
vumbuka;
Lukwikilu na Yehowa ke ningisa nyonso.

Ya kele kieleka. Oh, la la! Ya kieleka ya ke mutindu yina. Beno vwanda na lukwikilu na Nzambi. Beno tala na Yandi. Beno ningana ve. Beno vwanda kaka kuna. Nzambi tubaka yawu!

97 Mpe, bampeve ya yimbi, ba kele yinki? Ba kele moyo ya kimpeve. Ntangu yayi, dokotolo ke tuba, “Benno kele na cancer. Benno kele na koso-koso ya menga. Benno kele na cataracte. Benno kele na pleurésie. Benno kele na *yayi*.” Ya kele mpeve ya yimbi. Ya kele luzingu, mpe na manima ya luzingu yango kele mpeve. Bantu yikwa zaba mpe lenda mona ti cancer, cataracte, ya kele—ya kele. . . Ya kele mpeve, ya kele—ya kele na luzingu na kati ya yawu. Mbote, kima ve lenda vwanda na luzingu kukondwa

mpeve, beno me mona, na yawu ya fwana vwanda na luzingu mosi samu na kunata yawu na kusala, kisika mosi.

⁹⁸ Ata yinti yina kele kuna kele na luzingu na kati ya yawu. Mayela ya yinza nyonso na yinza lendaka sala ve kitini mosi ya ditiiti. Beno zaba yawu? Ba ke sala kima kutalana mutindu yawu, kasi ba lenda ve kuzwa kutindu ya luzingu. Ya kele Nzambi. Beno me mona? Yesu tubaka na yinti, “Vwanda ya kusinga. Nge kele na ata mbuma ve, mpe nge ke kuzwa ata mosi ve.” Ba vutukilaka na nzila yina. Ya vwandaka na kutala bangunga nana na suka yango. Ba vutukilaka na kutala na bangunga kumi na mosi, na yina ba vwanda kwenda na kudya. Pierre tubaka, “Beno tala yinti yina, ya me kufwa katuka misisa.” Samu na yinki? Yesu sembaka luzingu yina vwandaka na kati ya yinti yango, yina vwandaka na kati ya misisa, mpe kima nyonso kufwaka. Alleluia!

⁹⁹ Klisto mosi yango lenda semba cancer katuka misisa, mpe kima nyonso ke kufwa. Yinti yango vwandaka ya kutelama kuna kaka mutindu ya vwandaka, bangunga ntete, kasi ba me tala makasa kubanda na kubwa, mpe na manima kumona mpusu kubanda na kukatuka. Mpe . . . Me banda na kubeba, kilumbu na manima ya kilumbu, mpe lumingu na manima ya lumingu, mpe na manima ya mwa ntangu ya vwandaka dyaka ve na ndambu mosi ya yinti yango yina bikanaka. Alleluia! Cancer, kuvimba, cataracte, to kima nyonso yankaka, fwana kwenda ntangu Klisto ke zonza. Yandi basisaka bampeve ya yimbi. Mpe Yandi tubaka, “Na Nkumbu ya Munu ba ke basisa bampeve ya yimbi, ke zonza bandinga ya malu-malu, ke simba banyoka, to ke kunwa bima yina ke kufwaka, yawu ke sala bawu mpasi ve. Kana bawu tetika maboko ya bawu na zulu ya bambevo, bawu ke beluka.”

¹⁰⁰ Beno zola Yandi? Lemvo samu mu me kanga beno awa ngunga mosi na manima ya midi, ya kuvwanda awa. Beno zola Mfumu? [Dibuundu me tuba, “Amen.”—Mu.] Yinki ke salama ntangu yayi? Kana beno ndima Klisto mutindu munganga ya beno, mpe kukwikila na kati ya ntima ya beno ti kima me salama na beno, mpe ti beno kwikila ti beno me beluka, beno ke kwikila ti beno me beluka? Beno bika ve dyabulu kutula kima yankaka na beno. Beno landila kaka.

“Dokotolo,” beno tuba—beno tuba, “dokotolo, wapi mutindu yawu kele?”

Yandi ke tuba, “Beto tala, ya kele ntete kuna.”

¹⁰¹ Na kati ya ntima ya beno zaba, beno zaba yinki me salama. Huh! Kima ya ntete beno zaba, yandi ke tuba, “Tiens, mu ke na kumiyufula yinki me salama na kima yango?”

¹⁰² Kuna beno ke tuba, “Tala, dokotolo, mu ke tuba na nge. Tala yinki me salama, Yesu Klisto me belusa munu. Ya kele kieleka. Yesu Klisto me belusa munu.”

103 Mbote, beto kulumusa bayintu ya beto mwa ntangu fyoti. Mpangi Willett, nge lenda kwiza awa minuti fyoti, mpangi-bakala?

104 Ntangu yayi, Tata ya Mazulu, beto ke vutula matondo samu na Menga ya Klisto. Mpe mu banza bantangu yankaka ti kisadi ya Nge, Mfumu, ke kondwaka ndwenga, na kuzonza mingi-mingi. Kasi mu ke kumitala mutindu Paul, yina longaka mpimpa nyonso mpimpa mosi. Mpe muntu mosi kubwaka na nela mpe kufwaka. Mpe ntumwa yina, na Ndinga ya Nzambi na kati ya luzingu ya yandi, kwendaka mpe kwenda tula nzutu ya yandi na zulu ya mwana ya bakala yango, luzingu vutukaka na kati ya yandi mpe yandi zingaka dyaka.

105 Nzambi ya luzolo, mu ke na kubakula ti kulala ya mwini ya kuyalumuka ya nene yayi ke na kuvwanda ntangu yayi, kieleka me luta, kati-kati ya kilumbu me luta, ndombi ya mpimpa ke na kubwa. Nsemo ya nene ke na kungenga katuka Kimfumu ya Nzambi, samu na kubaka kisika ya yawu na yina ndombi ya nene ke na kwiza na zulu ya ntoto. Nzambi, mu ke na kubakula ti mu ke na kukulaka konso kilumbu. Ti mu kwenda na ntwala, Mfumu. Pesa munu ngolo. Sadisa munu na kutuba Kieleka ya nene yayi bisika nyonso. Sadisa beto, mbasi na manima ya midi, ti beto kubakula mingi.

106 Mpe, Nzambi ya luzolo, sakumuna mwa bantu yayi yina ke na kuwa na manima ya midi yayi. Na nkokila yayi, na yina ba me vukana samu na lukutakanu ya kubeluka ya nzutu, ti konso bakala mpe kento kuzonza na mosi na mosi mpe kwenda kusolula, mpe kutuba, “Ntangu yayi, awa kele. . . kusala ntembe ve—ve ata fyoti dyaka. Beto me bakula kisika ya ke katukaka kubanda ntangu yayi. Beto zaba ti ya kele mpeve ya yimbi. Mpe beto zaba ti ntangu yandi ke kwendaka, yandi fwana tumama na lutumu ya Nzambi. Yandi fwana sala yawu. Nzambi tubaka yawu. Yandi fwana kwenda.” Na manima, ti ba basika, na kilengi, na nsayi, na kuzonzilaka kubeluka ya bawu. Kima ve, ti kima ve kutelama na nzila ya bawu, dyaka; kukwenda kaka, na kukwikilaka.

107 Mpe, Nzambi, bika ti mwa dibuundu yayi awa, mpe na mabuundu yayi yina me vukana, kuzwa reveil na manima ya lukutakanu yayi, Mfumu, ti ba ke fulusa yawu, mpe bankama mingi ya myela kunatama na Kimfumu ya Nzambi. Pesa yawu, Tata. Bika ti babakala mpe bakento awa, bisika nyonso na bayinsi mpe bisika yankaka, ti ba nata Nsangu na mabuundu ya bawu, mpe ti ba kuzwa reveil ya ntangu ya ntama. Pesa yawu, Mfumu. Lemvokila beto masumu ya beto ntangu yayi. Sadisa beto na kuvwanda bisadi ya Nge. Na Nkumbu ya Yesu Klisto. Amen.

108 Mu ke na kumiyufula, na yina beno kele ya kuvwanda awa, ya kele na musumuki na kati ya yinzo awa bubu yayi, yina zola

kutuba, “Mpangi Branham, bambuka munu moyo na bisambu”? Beno zola, kutelemisa diboko ya beno? Ya kele na muntu ya masumu awa? Mu . . . Nzambi kusakumuna nge, mama. Ya kele? Nzambi kusakumuna nge, tata. Nge, mpe nge, mpe nge, Nzambi kusakumuna beno. Mu ke na kumiyufula kana beno . . . Ntangu yayi, yayi kele samu na beno.

¹⁰⁹ Beno me mona, mu ke kwikilaka ve na kukota na kati ya bantu. Mu ke na kuzonza yimbi ve samu na bayankaka yina ke na kusala yawu. Mu ke kwikilaka ve na kukota na kati ya bantu mpe kumeka na kubenda muntu. Beno me mona? “Muntu ve lenda kwiza, kana Tata ve me benda yandi.” Beno me mona? Ya kele kieleka. Beno ke benda kaka yandi kuna kukondwa luzolo ya yandi. Beno me mona? Kasi kana Nzambi kubula na ntima ya beno, beno kele mukweto ya nene na yinza. Beno zaba kaka ve na bantu yikwa mu me kuzonzila.



BAMPEVE YA YIMBI — NA KATI YA NZUTU KNG53-0608A
(Demonology — Physical Realm)

BANDANDANI YA BAMPEVE YA YIMBI

Nsangu yayi ya Mpangi William Marrion Branham, kulongamaka na Kingelesi, na nokila ya Kilumbu ya ntete, kilumbu ya 8 ya Ngonda ya sambanu, na mvula 1953, na Amphithéâtre ya Park Roberts na Connersville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org